



# BERG NUUS

DIE BERGKLUB VAN SUID-AFRIKA  
AFDELING TYGERBERG  
TYGERBERG SECTION

POSBUS / PO Box 4572  
7536 TYGERBERG

Mei 2013

## **Berg-Informasie**

Na 'n lang gesukkel het ons uiteindelik ons eerste nuusbrief vir die jaar. Kane ek asseblief 'n versoek aan alle stap leiers rig om so spoeding moonlik hulle stap berigte aan my te versorg by, [2shots2@gmail.com](mailto:2shots2@gmail.com). Op die manie kan ek hopelik vinniger vir almal 'n nuusbrief uitstuur.

### **Ledenuus:**

Ons verwelkom die volgende nuwe lede by die klub: Liza Vorster en haar seun, Jacques Schlebusch, asook Sean O'Kennedy. Ons hoop hulle sal nog lank saam met ons stap. Frans Viljoen het na Pretoria verhuis en het uit die klub bedank. Frans was deur die jare vir ons jongeres 'n voorbeeld en inspirasie. Ek dink ons sal nog lank oor Frans en sy wit tekkies praat. Ons hoop hy sal lekker bly daarbo in Gauteng.

## **BERGSTORIES**

### **Springstygbeugel/Slanghoekafgronde 26-27**

#### **Januarie 2013**

Ons het half 9 Saterdagoggend vanaf Durbanville McDonalds vertrek, met Elanie wat die dag begin het met 'n Cheeseburger.

Na dié voedsame ontbyt het ons in die pad geval en moes natuurlik eers by Bovlei Winkelder, anderkant Wellington stop, waar Altus vir hom bottels R15-wyn gekoop het. Uiteindelik is ons Bainskloof pas uit en die sewe van ons val toe ongeveer 10h in die pad. Na 'n paar kilo's op die jeep track het ons by die monument gestop vir 'n groepsfoto en toe aangestap na die keerwal vir 'n koppie tee, waar ek en Elanie eers die water aangedurf het. Die verfrissende swempie was net die regte manier om die lang stap tot die groot rots, waar ons sou slaap, te begin. Nie te ver ná die keerwal nie, is ons bo-oor Gawie se water, 'n diep sloot wat met dinamiet en handgrawe gemaak is om die rivierwater na die plase te lei. Die jeep track het so 100 m hierná in 'n smal, maar uitgetrapte paadjie verander. Middagete is by Junction Pool genuttig, met nog 'n swempie en 'n slapie onder die bome. Tot dusver was die pad redelik gelyk, maar het stadig styler begin raak vanaf Junction pool. Op 'n stadium het die pad effe weggeraak en is ons genoodsaak om bietjie 'bundu bashing' te doen. Gelukkig na nie té veel beenskrappe en skeeftrappery nie, het ons weer die pad gevind en voort gesnel na die styl bult net voor ons blyplek vir die aand. Met almal redelik uitgeput, het ons so half 6 by die rots aangekom, tent opgeslaan, gebad en toe sundowners, met 'n uitsig oor

die Slanghoekvallei, geniet. Die volgende oggend het net Japie en Altus kans gesien om die Slanghoekafgronde aan te durf, terwyl ek, Sean, Terence en Elanie in die tent gesit en kaart speel het en Renier onder die rots gelê en koerant lees het. Om en by 11h het ons weer in die pad geval en gaan tee maak by die poele. Middagete en swem was weer by Junction Pool en daarna het ons vinnig uitgestap. Die wind het op hierdie stadium hoogs onplesierig geraak met 'n paar hoedens wat rondgevlug het. By die karre gekom, is skoene uit en beursies in die hand in der haas na die hotel waar ons die heerlike naweek afgesluit het met 'n bier.



*-Hannelize Kritzinger*

### **Naweek saam met Worcester Afdeling.**

Saterdagoggend 9 Maart is die Kritzingers, hul dogter Hannelize en haar vriend, Sean, vroeg by die huis weg om die mense van Worcester Afdeling op Riviersonderend te ontmoet vir 'n stap in Eksteenskloof. Ons sou aanvanklik 'n ander kloof besoek het, maar as gevolg van die Ramfest wat daar gehou is, moes die roete verander word. Tonie Roux, 'n voormalige lid van ons afdeling, het ons saamgenooi en ons het besluit om 'n slag saam met hulle te gaan stap.

Op Riviersonderend het ons die stapleier vir die naweek ontmoet en ons is toe weg na Stormsvlei waar die res by ons aangesluit het. Philip, die stapleier, het ons toe 'n ent teen

die berg laat opry en eers 'n bietjie inligting gegee oor die omgewing. Ons het almal eers heerlike druiwe by Erna, boervrou in die Worcester omgewing, gekry voordat die 2 uur lange stap na 'n oorhangkrans aangepak is. Ons was reeds 12 uur by die krans waar ons ook oornag het. Almal het dus 'n vroeë middagete gehad voordat ons die middag 'n entjie in die kloof opgestap het en na 'n paar watervalle en swempoele gaan kyk het.

Daar is natuurlik deur 'n paar dapperes geswem, maar die water was maar kouerig.

Die aand het ons heerlik gekuier en gesels en ons het regtig baie gawe mense ontmoet. Ons was sowaar drie Ernas op die stap, nl. die uwe, Erna Roux en Erna die boervrou. Philip het ook die aand vir ons 'n gedig wat hyself geskryf het, voorgelees.

Sondagoggend het ons toe met 'n ander roete teruggestap motors toe en 'bundu bashing' was ons voorland. Gelukkig was dit nie te ver nie en was ons reeds voor middagete by die motors. Dit was 'n baie rustige stap en ons het heerlik in die berg ontspan.

*-Erna Kritzinger*

### **Tietiesbaai kamp: 15-17 Maart 2013**

Die wekus se weer is onvoorspelbaar, maar as die wind nie waai nie en die son skyn is dit net ongelooflik. Dis wat ons klomp ervaar het wat die naweek daar gekamp het. Die Vrydagaand het begin met reën, maar Jasper was gereed met 'n versterking vir elke nuwe aankomeling. Johan en Elmien se gazebo was die wegstroopplek teen die reën en die Benkensteins het gewys tent opslaan in die donker is maklik.

Saterdag oggend het die flukses onder ons kuslangs gestap, suid al met die rotse en duine langs. Weereens het ek besef, dis 'n harde wêreld hierdie. Die kuslyn is nog baie ongerep, die water yskoud met moeilike branders. As jy weet hoe en waar, kan jy ook

‘n kreef of twee uithaal. Die klub is egter stappers, en ons het maar sonder krewes gebly. Na dieoggend se mistige weer, het die son die middag warm geskyn, en dit was windstil. Die middag is verwyd met slaap, gesels, voëls kyk, ‘n vinnige swem in die yswater en gesels.

Sondagoggend het ‘n paar van ons in Paternoster se rigting gestap. By die eerste goeie watgat het ons vertoef en koffie of koeldrank geniet. Daar was ook die heerlikste vars gebakte brood met snoek patee. Die uistig was poskaart mooi. Windstil blou water, kreefbootjies tussen die rotse en pragtige seevoëls.

‘n Heerlike naweek het ten einde geloop toe ons ongelukkig later moes oppak om weer huiswaarts te keer. Die weer het saamgespeel die naweek, maar dis die mense wat saam was wat dit lekker gemaak het.

*-Estelle Zietsman*



### **Tankwa karoo fietstoer of te wel “Tankwa Epic Masters”!!**

Dinsdagoggend 8 vm het 7 van ons, dit is nou Japer en Lizbe van Breda, Gerrit en Erna Kritzinger, Willemien Law en Charlie en Freda Buckle vanaf die Buckles se huis vertrek in twee voertuie. Die eerste stop was in Ceres

om die inwendige ‘n bietjie te versterk met ‘n “pie” en koffie!

Dit is ook hier waar Gerrit se broer, Karel en Chrissie by ons aangesluit het. Hulle het van Colesberg af gekom.

Die pad het ons gelei na Op die Berg en ‘n klein entjie anderkant Op die Berg het ons die afrit na Calvinia gekry. Fietse is afgelaai, foto’s is geneem en die lang tog oor ses dae per fiets/motor het begin! Almal vrolik en vol geselsies het die klomp op die fietse vertrek in heerlike koel bewolkte weer. Ek, Willemien en Chrissie het die voertuie bestuur. Die eerste deel van die pad was redelik gelykerig en toe tref hulle Katbakkies pas. ‘n Lekker vet opdraand! Party het getrap en party het so nou en dan die fietse gestoot, maar aanhouer wen en kort voor lank was almal bo. Ek en Erna het posisies verander en ek was nou weer op die fiets en sy agter die stuurwiel! Hoe hoor ek die ou geharde stappers sê: “Na elke opdraand is daar ‘n afdraand.” Dié sê ding het my al baie keer die nodige moed gegee in die berge as ‘n opdraand nie ent wil kry nie. En so was dit ook. Skilderypas af was heerlijk! Almal is met ‘n spoed daar af en sommer gou het ons die bordjie, Sothemba Lodge, waar ons die eerste nag gekamp het, gekry. (33km later per fiets) En was ons aangenaam verras! Ek dink ons kan almal getuig dat dié plek ons weer gaan sien. Bill Vos het moeite gedoen om ons welkom te laat voel en het selfs die lapa vir ons aangebied om in te braai en kuier toe die wind opgekom het. Party het ook opgradeer en in klaaropgeslaande tente met beddegoed ingetrek.

Die tweede dag is ons eers almal in die motors en fietse op die fietsrakke daar weg by Sotemba Lodge en na 30km se ry het ons die Tankwa Karoo Nasionale Park se afrit gekry. Jasper, Lizbe en Karel het weggespring op die

fietse en die volgende 70 km aangedurf. 'n Heerlike effens afdraande pad. Halfpad het party fietsryers en motorbestuurders omgeruil en het ons die middag by Perdekloof in die Tankwa Karoo Nasionale Park arriveer. Aangenaam verras met heerlike geriewe. Twee kombuise, twee storte en twee toilette. (Elke staanplek het sy eie geriewe. Hulle laat 6 persone per staanplek toe.) Willemien het sommer die tweede kombuis as haar slaapkamer ingerig! Geen krag, maar wel gas. Almal het geskarrel om die regte plek vir tentopslaan te kry. Na 'n lekker warm stort is die braaivleisvure aangesteek en kan julle dit glo. Ons het heerlike vis gebraai daar in die Karoo! Dankie Willemien.

Die derde dag het ons oorgestaan en het ons lui opgestaan, die heerlike sonskyn Herfsdag begroet en na 'n lekker "bacon en eier" ontbyt het ons gaan kyk of ons die verskillende soorte bokke wat in die Park is te sien, maar nee. Net 'n paar springbokkies. Dag vier het almal, behalwe Chrissie, Willemien en ekke, wat die voertuie moes bestuur, met hulle fietse in die pad geval. 30 km later het hulle die Gannakapas bereik – 'n riller van 'n opdraand.

Charlie het besluit trap sal ek hom trap, en stadig maar seker het hy dit gedoen! Die res, Gerrit, Carl, Jasper en Lizbé het ook maar stomend bo uitgekom. Na 'n lekker koppie tee en 'n soetdingetjie is die pad verder aangedurf. Middagete is langs die pad genuttig in die skaduwee van 'n groot ou bloekomboom. Ek en Charlie het sommer die grondseil en kussings uit gepluk en 'n lekker middagslapie gedoen. Daarna is die laaste 30 km na Middelpas aangedurf. Teen die wind en lui geëet en geslaap het ons so teen 4:30nm by Middelpas se Hotel gearriveer. Nou moet julle mooi verstaan. Die "dorpie" Middelpas het een eienaar. Die winkel, hotel ens. behoort aan een eienaar. Daar is so 300 inwoners in Middelpas. Moeg, vuil en dors het ons Middelpas se voorstoep ingeneem. Ons

moes eers wag om in te boek, want die eienares was eers by haar winkel, oorkant die pad. Willemien het sommer gou-gou alles vir ons gereël en kon ons elkeen in ons eie kamer en badkamer week om skoon te kom.

6nm was bymekaarkomtyd op die stoep van die hotel. Die eienaar se seun het vir ons 'n platter gebring van hul eie bokmelkkaas wat hulle daar op Middelpas maak. Elkeen het sy eie kommentaar gehad oor die smaak van bokmelk!! Ek dink ek en Jasper het die swaarste gekry met dié vreemde smaak. 7nm was etenstyd. Heerlike hoenderpastei, skaapboud, gebakte aartappels, rys, twee soorte pampoen en 'n heerlike groentegereg. Die poeding was kaaskoek, natuurlik gemaak van bokmelk. Moet sê met só 'n ete in jou maag het die oë vinnig toegetrek en is almal vroeg bed toe.

Dag 5 het die klomp vanaf die Hotel begin fiets en ons het Willemien ook sover gekry om so 15km te trap. Hulle het koers gevat in die rigting van Sutherland. So 36km verder het ons die afdraai na Witjan se plaas gekry. Middagete is genuttig onder 'n heerlike koelteboom en toe is die laaste skof ingesit na die plaas. Daar aangekom was ons aangenaam verras. Warm water, 'n heerlike lapa om in te kuier, elektrisiteit en kon ons selfs die rugby kyk! Ons het die aand lekker "steak en chips" geëet wat Gerrit vir ons gebraai het. En so het dag 6, die laaste dag van die fietstoer aangebreek! Oubergpas is 'n riller! Carl, Japer, Charlie, Gerrit en Erna het aanvanklik kans gesien vir dié pas. Na 'n klein entjie het Erna besef wat is goed vir haar en besluit om op die voertuig te klim. Die manne het die pas oorwin, maar hulle was maar bekommerd oor die vrouens wat die voertuie moes bestuur. En so is nog 'n fietstoer agter die rug en ek glo dit was vir almal 'n heerlike ervaring.

*-Freda Buckle*

# Aankomende stappe:

## **Sederberg stap 17-19 Mei 2013**

Ons kamp en braai Vrydag 17 Mei en  
Saterdag-aand 18 Mei by Sanddrif  
(Dwarsrivier) in die Cederberg.

Saterdag stap ons van die kampplek teen die  
berg uit en deur die Wolfberg-skeure.  
Hiervandaan stap ons verder tot by die  
Wolfberg-boog. Hier doen ons middag-  
ete. Ons kom dieselfde roete terug. Dit duur  
ongeveer 8 uur.

Die Saterdag-aand is die sterrewag by  
Dwarsrivier oop. Dit behels 'n skyfie-vertoning  
van 45 min waarna daar deur die teleskope  
gekyk word. Malcolm sê: Kom vroeg vir 'n  
goeie sitplek!

Sondag se voorgestelde stap na die Maltese-  
kruis is af weens die brand in Januarie. Ons  
kan maar daar besluit wat om te doen.

Pak in soos vir 'n kampnaweek met twee  
dagstappe. Dit kan goed koud wees. Goeie  
geriewe (warm storte, spoeltoilette, water,  
elektrisiteit). Bring roosters, hout , vleis,  
drinkgoed, ens.

Die koste van die kampplek vir twee nagte is  
R76,67 p.p indien ons 'n maksimum van  
twaalf stappers is. Die permit vir die  
Wolfberg-skeure kos R50 p.p en vir die  
Wolfberg-boog R100 p.p. of gratis indien jy 'n  
Wildkaart het. Laat weet jou nommer saam  
met jou bespreking. Betaal asb. jou deel voor  
Vrydag 10 Mei in die volgende rekening:

J van Breda

Capitec Bank (470010)

Spaarrekening 1130166463